

## PN aprova projetu-lei kódigo mineiru ho unanimidade

**DILI, 24 maiu 2021 (TATOLI)**—Parlamentu Nasionál (PN), segunda ne'e aprova ona projetu-lei Kódigo Mineiru ho unanimidade iha finál globál.

Projetu-lei nú 4/V(1<sup>a</sup>)-Kódigo Mineiru ne'e aprova iha finál global ho rezultadu votasaun a-favór 56, laiha kontra no abstensaun.

“Parlamentu Nasionál aprova ho unanimidade kona-ba lei kódigo mineiru. Ne'e marka importante ba Timor-Leste iha nia desenvolvimentu ekonomia, kuaze tinan 20 depois restaurasaun independénsia konsege iha lei ne'e, se Prezidente Repúblika promulga sai ba lei ona Timor-Leste iha ona lei kódigo mineiru,” Prezidente Parlamentu Nasionál, Deputadu Aniceto Longuinhos Guterres Lopes, anúnsia liuhosi plenária.

Prezidente Parlamentu Nasionál fó apresiasaun ba Komisaun D ne'ebé trata asuntu Ekonomia no Desenvolvimentu, tanba primeira vez Timor-Leste iha lei kódigo mineiru, ne'ebé aprova ho konsensuál ne'e mai hosi forsa política iha Parlamentu Nasionál.

Prezidente Komisaun D, Deputadu Antoninho Bianco, eslika bainhira insiativa ne'e sai ba lei sei dada investidór sira mai investe iha Timor-Leste, liuliu haree ba rikusoin mineiru sira.

Nia hatutan, iha aspeitu tolu iha projetu lei ne'ebé diskute faze jeneralidade mak hanesan prinsípiu hosi projetu ne'e la kontra konstituisaun, estrutura mak projetu ne'e ho artigu 6 de'it maibé Kódigo Mineiru ne'e hamutuk artigu 162, ikus liu sistema hosi projetu-lei ne'e la viola konstituisaun.

Nune'e, oras ne'e tama iha debate faze especialidade debate kada artigu hosi projetu-lei ne'e tanba iha artigu hamutuk 163 no aprova ona artigu 93.

“Lei Kódigo Mineiru tenke iha se lae rikusoin barak maibé ita la atrai konfiansa hosi ema estranjeiru atu investe iha ita-nia rain. Hosi artigu 163 ami aprova to'o artigu 93, kona-ba finaliza debate iha faze especialidade ne'e depende ba dinámika diskusaun,” Prezidente Komisaun D informa.

Konteúdu hosi Projetu-Lei Kódigo Mineiru ne'e atu regula atividade minerál nian inklui atividade rekoñesimentu preliminar, prospeasaun bá-oin no peskiza, avaliaasaun, desenvolvimentu, esplorasaaun no tratamentu iha área mineral rai-laran nian.

Nune'e mós transporte no komersializasaun minerál hodi haree fila-fali importánsia ba Estadu RDTL, liuliu kuandu atende impaktu no forneseimentu ba matéria prima sira, esensíal ba desenvolvimentu, kresimentu ekonómiku no prosperiedade nasaun nian.

Projetu-Lei Kódigo Mineiru hamutuk artigu 162 ho kapitulu 20 no anexu 3. Artigu 1 define aprovasaun kódigo mineiru, artigu 2 define política mineira, artigu 3 define objetivu sira kona-ba estratégia setór mineiru nian no ikus liu artigu 162 ne'ebé define dispozisaun tranzitória. Lei ne'e vigora bainhira kompleta loron 180 ne'ebé públia hosi Jornál Repúblika.

Proponente ba Projetu-Lei ne'e mak hanesan Deputada Virgínia Ana Belo, Deputadu Duarte Nunes, Adérito Hugo da Costa, Francisco de Vasconcelos, António Nobre Tilman, Maria Fernanda Lay, Maria Terezinha Viegas, Mariano Assanami Sabino, António da Conceição no Maria Angelina.

Purtantu iha loron 30 jullu 2020 liubá, representante povu sira aprova projetu-lei nú 4/V(1<sup>a</sup>)-Kódigo Mineiru ho rezultadu voatasaun a-favór 54 kontra 0 no abstensaun 0.

Tuir dokumentu ne'ebé Agência TATOLI, asesu iha Parlamentu Nasionál, iha anexu I hosi projetu-lei ne'e define klasifikasaun minerál komposta hosi minériu metáliku, jemas (gemas), minériu radiativu, *rochas* no minerál industriál, *carvão* no minériu de terras raras, anexu II ko'alia kona-ba taxa hosi *royalty* mineiru no anexu III define kona-ba renda superfísie.

Entretantu minériu metáliku define ouru, alumíniu, antimóniu, magnésiu, manganésiu, merkúriu, níkel, tantálu, titániu, zinko no seluk tán.

Hosi parte Gemas (jemas) komposta hosi água-mariña, granada, pedra da lua, pedra do sol, zirkaun no seluk tán. Hosi parte mineiru radiativu mak hanesan rádiu, tóriu, urániu no seluk tán.

**Jornalista: Evaristo Soares Martins    Editór: Cancio Ximenes**